

স্তম্ভ হইয়া বাসিয়া আছি ।

আমার পায়ের উপর উপদুড় হইয়া পড়িয়া রহিয়াছে আমার স্ত্রী । তাহার আলদুলায়িত কেশরাশি পায়ের কাছে খানিকটা জমাট অশ্বকারের মত পুঞ্জিত হইয়া রহিয়াছে—
অবরুদ্ধ ক্রন্দনাবেগে তাহার সর্বাঙ্গ কাঁপিয়া কাঁপিয়া উঠিতেছে ।

কি বলিব—কথা স্মরণে না ।

* * *

অতীতের চিত্রগুলি মনে জাগিতেছে ।

মনে পড়িতেছে সেই দিনের কথা যখন আমি স্কুলে পড়িতাম—যখন আমার কেশোর পার হয় নাই—যখন স্বপ্নের সঙ্গ সত্যের খাদ এত বেশী করিয়া মেশে নাই ।

স্কুলে পরম বন্ধু ছিল তকু—অর্থাৎ ত্রৈলোক্য । বন্ধুত্বের ইতিহাসও আছে একটু । আমি থাকিতাম বোর্ডিঙে আর তকু থাকিত বাড়ীতে । এক পল্লীগ্রামের মাইনর স্কুল হইতে বৃত্তি পাইয়া আমি শহরের হাইস্কুলের চতুর্থ শ্রেণীতে ভর্তি হইলাম । ঠিক সেই বৎসরই সেই স্কুলের পঞ্চম শ্রেণী হইতে প্রথম স্থান অধিকার করিয়া চতুর্থ শ্রেণীতে উঠিল তকু । মন্থচোরা ফরসা ছেলেরি । স্কুলের শিক্ষকগণ মেডার-লড়াই-দেখা মনোভাব লইয়া আমাদের উভয়ের পিঠ চাপড়াইতে লাগিলেন ।

দ্বিতীয় শিক্ষক মহাশয়—যাঁহার আগ্রহে আমি এই স্কুলে আসিয়া ভর্তি হইয়াছিলাম—একদিন আমাকে ডাকিয়া বলিলেন, “ওই তকুকে যেমন ক’রে হোক হারাতে হবে । পারবে ত ?”

সম্মতিসূচক ঘাড় নাড়িয়াছিলাম মনে পড়িতেছে ।

তখনও জানা ছিল না তকু কি বস্তু ।

তকুকেও নাকি তৃতীয় শিক্ষক মহাশয় গোপনে বলিয়াছিলেন, “ওই ছেলেরিকে কিন্তু হারানো চাই । শূন্য বটে ভালো ছেলে—কিন্তু হাজার ভাল হলেও পাড়া-গাঁ থেকে আসছে, ইংরেজীতে কাঁচা হবেই । তুমি চেষ্টা করলে ও কিছুতে তোমার সঙ্গ পারবে না—”

চেষ্টা করিলে তকু যে আমাকে অনায়াসে হারাইয়া দিতে পারিত এ-বিষয়ে এখনও আমি নিঃসন্দেহ ! তকু কিন্তু চেষ্টা করে নাই । সেই জন্য দ্বিতীয় শিক্ষক মহাশয়ের নিকট আমার মানরক্ষা হইয়া গিয়াছিল । তকু ছিল কবি—সে কবিতা লিখিতে সুর করিয়া দিল—অ্যালজেব্রা ও উপক্রমণিকা-মুখস্থ-করা ভাল ছেলে সে হইল না । তাহার কবিতাও এমন কবিতা যে তাহা আমার ফাস্ট হওয়ার গৌরবকে নিঃপ্রভ করিয়া দিল । নবোদিত দিবাকরের জ্যোতিতে ইলেকট্রিকের ব্যাতি ঘন হইয়া পড়িল । দিবারাত্র পরিশ্রম করিয়া আমি রহিলাম মানপূর স্কুলের ফাস্ট বয় আর তকু হইতে চলিল বঙ্গসাহিত্যের একজন উদীয়মান কবি । তফাৎটা যে কি এবং কত বৃদ্ধাইয়া বলিবার আবশ্যিক নাই ।

ফলে,—তকুর ভক্ত ও বন্ধু হইয়া পড়িলাম ।

ক্রমশঃ বন্ধুত্বটা এমন এক পর্যায়ে উপনীত হইল যে শুলের সীমানার মধ্যে আর তাহাকে ধরিয়া রাখা গেল না। তকু একদিন আমাকে বাড়ীতে নিমন্ত্রণ করিয়া লইয়া গেল। তকুর মায়ের স্নেহ-কোমল ব্যবহার আমার হৃদয় স্পর্শ করিল—কিন্তু আমাকে চমৎকৃত করিল আর একজন। তকুর বোন। অসাধারণ তাহার রূপ। ‘অসাধারণ রূপ’ বলিতেছি কারণ চক্চকে ধারালো সুন্দর একটা কথা খুঁজিয়া পাইতেছি না বলিয়া। এমন সুন্দরী সত্যই আমি দেখি নাই। ছিপাছিপে পাতলা গড়ন। চোখ মুখ নাক অদ্ভুত। একমাথা কালো কৌকড়ান চুল। গায়ের রং—সেও অতিশয় অপূর্ব। চাঁপাফুলে গোলাপী আভা থাকিলে যাহা হইতে পারিত তাহাই। মনে হইতে লাগিল যেন স্বপ্নাবিষ্ট শিল্পীর কল্পনা সহসা মূর্তি ধরিয়াছে।

আরও আশ্চর্য হইয়া গেলাম তাহার ব্যবহারে।

বছর-দশেকের মেয়ে অবাক হইয়া গেলাম তাহার গাম্ভীৰ্য দেখিয়া। আমার সহিত কথাই বলিল না! আচারে, ব্যবহারে, ভাবে ভঙ্গীতে বেশ সুস্পষ্ট করিয়াই সে বুঝাইয়া দিল যে আমাকে সে গ্রাহ্যের মধ্যেই আনিতেছে না। আমার সম্বন্ধে একেবারে নির্বিকার। মনে মনে আত্মসম্মানে একটু আঘাত লাগিল। চুপ করিয়া রহিলাম। বলিবার কি-ইবা ছিল। ১০০ সে দিনটা স্পষ্ট মনে পড়িতেছে।

* * * * *

তকুর বাড়ী প্রায়ই নিমন্ত্রণ হইত। প্রায় প্রতি রবিবারই। সুতরাং ক্রমশঃ কথা দু-একটা হইলই।

বেশ মনে পড়িতেছে প্রথম দিনই সে আমাকে বলিয়াছিল, “দাদাদের ক্লাসে আপনিই বড়ি ফাস্ট বয়?”

সত্য কথাই বলিয়াছিলাম, “হ্যাঁ—”

উত্তরে সে কি বলিল শুনিনে?

“বই মুখস্থ ক’রে ফাস্ট সবাই হ’তে পারে। দাদার মতন এমন সুন্দর কবিতা লিখতে পারেন আপনি?”

মনে পড়িতেছে একটু সলজ্জ গলা-খাঁকারি দিয়া বলিয়াছিলাম, “আমি তোমার দাদার মত নই ত। হ’তেও চাই না—”

“পারবেনই না—”

দশ বছরের মেয়ে!

॥ তিন ॥

দেখিতে দেখিতে চারিটা বৎসর কাটিয়া গেল ।

এই চারি বৎসরে ত্রৈলোক্যের বাড়ী বহুবার যাতায়াত করিয়াছি, কিন্তু মালতীর অর্থাৎ তকুর বোনের সহিত খুব অল্প কথাই হইয়াছে । যখনই যাইতাম দেখিতাম হয় সে আয়নায় মুখ দেখিতেছে—না হয় শাড়ীটি গুছাইয়া পরিতেছে—না হয় পরিপাটি করিয়া চুল বাঁধিতেছে—না হয় অর্মান একটা কিছুর । নানাভাবে সে আপনাকে সাজাইয়া গুছাইয়া রাখিতে ভালবাসিত । আয়নায় যখন সে চাহিয়া থাকিত মনে হইত যেন সে প্রণয়ীর মুখ-পানে চাহিয়া আছে । নিজের মুখখানির প্রেমে সে নিজেই পড়িয়াছিল । সে যে অদ্ভুত রূপসী এই সত্য কথা সে সম্পূর্ণরূপে উপলব্ধি করিয়াছিল এবং একদণ্ডও ভুলিয়া থাকিত না ।

তাহার বয়স যত বাড়িতে লাগিল—মাদকতাও বাড়িতে লাগিল । আমার সেই সদ্যজাগ্রত যৌবনে—বেশী বক্তৃতা করিয়া সময় নষ্ট করিতে চাহি না—আপনারা যাহা আশংকা করিতেছেন তাহাই ঘটিল । জীবনে সেই প্রথম প্রেমে পড়িলাম এবং সেই মেয়ের সহিত যে আমার সঙ্গ ভাল করিয়া কথা কহে নাই—যাহার ভাবে-ভঙ্গীতে কথায়-বার্তায় আমার প্রতি অবজ্ঞাই অনুরোধ ফুটিয়া উঠিয়াছে ! আশ্চর্য প্রেমের নিয়ম ! আমি ঠিক তাহাদের পালাটি ঘর ছিলাম, আমার ভাল ছেলে বলিয়া একটু সুনামও ছিল, মালতী যদি সামান্য একটু আশ্বাস দিত—বিবাহ আটকাইত না । কিন্তু আশ্বাস সে মোটেই দিল না । একদিন মনে পড়িতেছে তাহাকে আড়ালে পাইয়াছিলাম—মনের কথাটা গুছাইয়া বলিব মনে করিয়া অনিশ্চিতভাবে একটু আমতা-আমতা করিতেছিলাম । আমার ভাবগতিক দেখিয়া মালতী হাসিয়া বলিয়াছিল, “আপনি যা বলবেন তা আমি বুঝতে পারছি । কিন্তু বলবেন না ! নিজের চেহারাটা কখনও দেখেছেন আয়নায় ?”

এই বলিয়া সে বাহির হইয়া গিয়াছিল ।……সেদিন সন্ধ্যায় স্কুলের খেলার মাঠটাতে অনেকক্ষণ একা একা ঘুরিয়া বেড়াইয়াছিলাম মনে পড়িতেছে । ইহাও মনে পড়িতেছে যে অত বড় রুঢ় আঘাতের পরও মালতীর উপর বিতৃষ্ণা আসে নাই ! বরং তাহার পক্ষ লইয়া নিজেরই সঙ্গ তর্ক করিয়াছিলাম । যাহার গর্ব করিবার মত রূপ আছে সে তাহা লইয়া গর্ব করিবে বই কি ! রূপসী মাত্রেই গর্বিণী । গর্বটা সৌন্দর্যের একটা অলঙ্কার । অনেক উপস্যা করিয়া তবে সুন্দরীর মনের নাগাল পাওয়া যায় । এমনি কত কি ষড়্ধ ।

আমি কিন্তু আর সময় পাই নাই । সেটা ম্যাট্রিক দিবার বছর । পড়াশোনায় কিছুদিন ব্যস্ত রহিলাম—তাহার পর পরীক্ষা দিয়া বাড়ী চলিয়া আসিতে হইল । মানপুরে ফিরিয়া যাওয়ার অজুহাত শীঘ্র আর পাওয়া গেল না ।

॥ চার ॥

ইহার পর আরও চারি বৎসর কাটিল ।

আমার উপর দিয়া অনেক ঝড়ঝাপটা গেল—বাবা, মা মারা গেলেন । সংসারে আমার আর আপন বলিতে বিশেষ কেহ ছিল না । কলিকাতার মেসে নিঃসঙ্গ জীবনযাপন করিতেছিলাম । মালতীকে ভুলি নাই । ভোলা যায় না বলিয়াই ভুলি নাই । তাহাকে পাইবার আশা অবশ্য অনেকদিন ত্যাগ করিয়াছিলাম ।

তকুব পত্র মাঝে মাঝে পাইতাম ।

সে সাহিত্য-সাধনায় এমন তন্ময় হইয়া গিয়াছিল যে ম্যাট্রিকটা পর্যন্ত পাস করিতে পারিল না । অথচ তাহা তাহার পক্ষে কতই না সহজ ছিল । তকুর বাবাও মারা গেলেন । তকুদের অবস্থা খুব ভাল ছিল না—আরও খারাপ হইয়া গেল । একদিন তকুর পত্র পাইলাম—লিখিয়াছে মালতীর জন্য একটি ভাল পাত্রের সন্ধান আমি যেন করি । পাত্রটি আর যা-ই হউক সুরূপ হওয়া প্রয়োজন, কারণ কালো বলিয়া দুইটি ভাল পাত্রকে মালতী কিছুতেই বিবাহ করিতে রাজী হয় নাই । উত্তরে লিখিলাম, “ভাল পাত্রের সন্ধানে রাহিলাম । জানাশোনা একটি ভাল পাত্র আছে—কিন্তু চেহারা তেমন সুবিধার নয় । মালতীর পছন্দ হইবে না । বল ত সম্বন্ধ করি !”

সাগ্রহে প্রতীক্ষা করিয়াছিলাম ।

কোন উত্তর আসে নাই ।

॥ পাচ ॥

আরও কিছুদিন কাটিয়াছে ।

এম-এ পাড়িতেছি । আশ্চর্য মানুষের মন । হঠাৎ একদিন আবিষ্কার করিলাম যে মালতী কখন মন হইতে অতীর্কিতে সরিয়া গিয়াছে । তাহার স্থান অধিকার করিয়া বসিয়াছে আর একজন—মৃদুহাসিনী মৃদুভাষিণী মিস্ মিত্র । আমার সহপাঠিনী ।... আলাপটা হইয়াছিল লাইব্রেরীতে । এথিল্ডের একটা অংশ-বিশেষ বন্ধিয়া লইবার জন্য মিত্র আমার সমীপবর্তিনী হইয়াছিলেন । সেই হইতেই আলাপ । আলাপ সাধারণতঃ যেভাবে ঘনিষ্ঠতর হয় সেই ভাবেই হইয়াছিল । মিস্ মিত্র যে সুন্দরী তাহা নয় । কিন্তু তাহার চোখে মুখে এমন একটা মার্জিত কমনীয়তা, এমন একটা সংযত মধুর বুদ্ধিদীপ্ত রূপ দেখিয়াছিলাম যে মনে রং ধরিয়া গেল । ..ক্রমশঃ দেখিলাম তাহার অনুপস্থিতিতেও আমি তাহার কথা চিন্তা করিতেছি, অজ্ঞাতসারেই তাহার চলা-ফেরা লক্ষ্য করিতেছি, কোন্ কোন্ রঙের শাড়ী পরিলে তাহাকে মানায় তাহা বিশ্লেষণ করিতেছি এবং কখন সে ক্লাসে আসিবে সেই আশায় দ্বারের দিকে চাহিয়া বসিয়া আছি ।

॥ ছয় ॥

যখন মিস্ মিত্রের সঙ্গে আমার বিবাহের কথা পাকা হইয়া গিয়াছে—আর কয়েকদিন পরেই বিবাহ—এমন সময় তকু আসিয়া হাজির ।

তকুর মুখে সমস্ত শুনিয়া অবাক হইয়া গেলাম !

বলিলাম, “সে কি সম্ভব ?”

তকু বলিল, “সম্ভব অসম্ভব বুঝি না ভাই—সমস্ত খুলে বললাম । ওকে এখন আর কে বিয়ে করবে বল ? অসাবধানে শ্টোভ জ্বালাতে গিয়ে—ছি, ছি, কি কাণ্ডটাই হয়ে গেল । মা বললেন তোর কাছে আসতে । তুই ছাড়া কাউকে এ অনুরোধ করতেও সাহস পাই না যে !—” বলিয়া তকু হঠাৎ কাঁদিয়া ফেলিল ।

তাহার চোখে জল দেখিয়া অত্যন্ত বিচলিত হইলাম । তাহাকে বুঝাইয়া বলিলাম, “না ভাই এখন আর সে হয় না । অনেক দূর এগিয়ে পড়েছি । চল মাকে গিয়ে আমি বুঝিয়ে বলছি—”

মানপূর গেলাম ।

* * * * *

পায়ের উপর উপড়ে হইয়া শ্রী বলিতেছে শুনিতোছি, “কক্ষণো তুমি আমায় ভালবাস না—কক্ষণো না । একদিনও বাসনি, বাসতে পার না । আমায় তুমি শূন্য দয়া করেছ—কে তোমার দয়া চেয়েছিল—কেন তুমি দয়া করেছ—কেন—কেন—কেন—কেন—”

পাগলের মত বলিয়া চলিয়াছে ।

“শোন—একটা কথা শোন—পায়ের উপর থেকে মূখ তোল—”

অশ্রুসিক্ত মূখ সে তুলিল ।

মালতীর অনিন্দ্যসুন্দর মূখ আগে যে দেখিয়াছে তাহার এ মূর্তি দেখিয়া সে শিহরিয়া উঠবে । বীভৎস পোড়া কদাকার ! অসাবধানে শ্টোভ জ্বালিতে গিয়া সমস্ত মূখটাই তাহার পড়িয়া গিয়াছিল ।

মিস্ মিত্রের খোলা চিঠিখানা কাছেই পড়িয়া রহিয়াছে ।